

PSALMI DICENDI

IN FESTIS TOTIS DUPLICIBUS AD I. VESPERAS,
NISI ALII PROPRIIS LOCIS NOTATI FUERINT.

Psalmus 112.

LAUDATE púeri Dómini : * laudáte nomen Dómini.

Sit nomen Dómini benedíctum, * ex hoc nunc, et usque in sæculum.

A solis ortu usque ad occásum, * laudábile nomen Dómini.

Excélsus super omnes gentes Dóminus, * et super cælos glória ejus.

Quis sicut Dóminus Deus noster, qui in altis hábitat, * et humília réspicit in cælo et in terra?

Súscitans a terra inopem, * et de stércore érigens páuperem :

Ut cóllocet eum cum princípibus, * cum princípibus pópuli sui.

Qui habitáre facit stérilem in domo, * matrem filiórum lætántem.

Psalmus 116.

LAUDATE Dóminum omnes gentes : * laudáte eum omnes pópuli.

Quóniam confirmáta est super nos misericórdia ejus : * et véritas Dómini manet in ætérnum.

Psalmus 145.

LAUDA ánima mea Dóminum, & laudábo Dóminum in vita mea : * psallam Deo meo quám diu fúero.

Nolíte confídere in princípibus : * in filiis hóminum, in quibus non est salus.

Éxíbit spíritus ejus, et revertétur in terram suam : * in illa die períbunt omnes cogitátiones eórum.

Beátus, cujus Deus Jacob adjútor ejus, & spes ejus in Dómino Deo ipsíus : * qui fecit cælum et terram, mare, et ómnia, quæ in eis sunt.

Qui custódit veritátem in sæculum, & facit judícium injúriam patiéntibus : * dat escam esuriéntibus.

Dóminus solvit compeditos : * Dóminus illúminat cæcos.

Dóminus érigit elísos, * Dóminus díligit justos.